

Ummannami Upernavimmilu eqqakkanik ikuallaavimmik pilersitsisoqarsinnaanera pillugu apequteqaat aallaavigalugu oqallisissiatut siunnersuut.

(Inatsisartunut ilaasortaq Knud Kleemann, Atassut)

Akissuteqaat

(Aalisarnermut, Piniarnermut, Nunalerinermut, Imminut Pilersornermut Avatangiisinullu Naalakkersuisoq)

Naalakkersuisut oqallisissiamik siunnersuuteqartumut qujapput. Kommune-nit taakkuupput eqqagassalerinermut akisussaasut, eqqakkat katersornissaat peernissaallu akisussaafigalugit.

Naalakkersuisut kommune-ni eqqakkanut suliaasaqarfimmi ilungersunartut ilisimavaat. Taamaammat Avatangiisinut Naalakkersuisup eqqagassat pillugit borgmester-it peqatigalugit ataatsimeeqatigiillat-taarnerit ingerlatilersimavaat. Ukkatarineqarpoq eqqakkanik ikuallanneqarsinnaasunik suliaqarnermi assartuinermilu qanoq kommune-t aaqqiissuteqarsinnaanerat.

Ataatsimoorussamik Naalakkersuisut Esani A/S-imi ikuallaaveqarnek innersuussutigalugulu taparserpaat. Ataatsimoorussamik ikuallaaveqarnermik aaqqissuussamik pilersitsineq, ilaatigut eqqagassat pillugit Naalakkersuisut periusissiamik pilersaarusiarnut 2020-2031-mut anguniagassaannut ilaavoq. Ikuallaaviit marluk pilersinneqarnerisa siunertaraa pitsaasumik eqqagassanik passussinissaq, avatangiisinut peqqissutsimullu illersuisumik, aammalu eqqakkanik ateqqiniikkut atorluarneqarnissaanut soorlu nukissiuuteqarnermut isumalluutiginnissaat siunertaralugu.

Ummannami Upernavimmilu ikuallaavinnik pilersitsinissamut siunnersuuteqarnek Naalakkersuisut aaqqiissutissaasorinngilaat. Ikuallaaveqqanik ingerlatsineq nalinginnaasumik avatangiisimut peqqissutsimullu innarliutaanngitsumik ingerlatsinissamut naapertuutinnngimmat. Aammattaaq dioxin-imik allanillu akuerineqanngitsumik akuutissanik navianartunik aniasoqarnissaa aarlerinaateqarlunnarmat. Misilittakkat takutippaat, ikuallaaviit mikisut ataatsimoortumik ikuallaaveqarnermut sanilliullutik eqqakkanut ton-inut ataatsinut sanaartornermut ingerlatsinermullu aningaasartuuteqarfiunerungaatsiartartut. Eqqagassalerinerup aningaasalersorneqarneranut mingutsitsisup akiliisarnera tunngavigineqarpoq. Aningaasartuutit annertunerulertussaapput tamannalu innuttaasut akiliutissaannut qaffatsitsissaaq. Taamaattumik aaqqiissutissanik aningaasaqarnikkut piujuartitsiffiusinnaasunik toqqaasoqarnissaa pingaaruteqarpoq.

Sisimiuni Nuummilu eqqakkanut ikuallaaviit nutaat marluk avatangiisinut tungatillugu Naalakkersuisut akuerinikuaat. Eqqakkanik ikuallaaviit avatangiisinut akuersissutigineqarnerani ilaatigut, teknikip pissarsiarineqarsinnaasup pitsaanerpaap BAT-ip atorneqarnissaa tunngavigineqarpoq. Kommuni ikuallaavinnik nutaanik pilersitsiniaruni imaluunniit maannakkut ikuallaaviusut ingerlatiinnassagunikkit, Sisimiuni Nuummilu ikuallaaviit nutaajusut avatangiisinut illersuinissamut piumasaqaataasut assigisariaqarpaat.

Eqqaaneqareersutut Avatangiisinut Naalakkersuisup tulleriiaarinermini eqqagassat pillugit borgmester-it ataatsimeeqatigillattaarneri aallartisarnikuuaa. Naalakkersuisut naatsorsuutigaat suleqatigiinneq ingerlanneqaannassasoq. Tamatuma saniatigut Naalakkersuisut Politikikkut Ataqtatigiisarisooqatigiit ataatsimiilerpata eqqagassalerineq eqqartorneqarnissaa pilersaarutigaat. Suliniutit aallartisarneqarput ataatsimoorluta eqqagassalerinerup avatangiisimut peqqissutsimullu isumannaatsumik isumagineqarnissaat qulakkeerniarlugu.

Taamatut oqaaseqarluta siunnersuutip oqallisigilluarneqarnissaa Naalakkersuisut qilanaaraat.